

licorum, à Gabaa verò Hierosolymam viginti duntaxat stadiorum intervallum. Vide ea quæ nos ad eum locum Judic. xix. dicimus.

Vigesimo quartò; Constringenda magis tribus Benjamin, præsertim verò qua parte Hierosolyma in Gabaa & Rama itur, ut Rama ferè sex milliariibus Italicis Hierosolyma distet, Gabaa viginti stadiis *Josephi*, hoc est, quatuor milliariibus *Josephi*: nam in quoque ipsius milliari illud ferè observatur quinque duntaxat *Josephi* esse stadia. Vide unde hæc colligam 1 Reg. x. v. 2.

Vigesimo quintò; *Bethania*, & *Bahurim* paulo viciniore Hierosolymæ constitui debent, sic ut *Bahurim*, quæ ab *Adrichomio* ferè duobus milliariibus *horariis Hierosolyma* abducitur, tantummodo semimillari Belgico seu horario ab illa removeri debeat. Vide quæ nos de hac re dicimus 2 Reg. xvi. v. 5. *Bethphage* quoque ab *Adrichomio* nimis à monte *Olivet* removetur, quam tamen in extremo ejusdem montis descensu, seu primo vallis aditu fuisse satis constat ex iis, quæ de BETHPHAGE in Onomastico diximus. Eam *Brochardus* in recta via, qua ex *Jerusalem* itur in *Bahurim*, & in medio itinere collocat, quod nullo modo exprimit tabula *Adrichonii*.

Vigesimo sextò; *Ramatha* Samuëlis patria in tribu Ephraim conjungi debet tribui Judæ, ut supra diximus num. 17. An autem tribus Benjamin & Ephraim extremitates Occidentales ita sinuari debeant, ut è *Ramatha* per sepulchrum *Rachel* juxta *Bethlehem* iter esset in *Gabad*, quemadmodum videri possit indicari 1 Reg. x. v. 2. in medio reliquimus, quam difficultatem à nobis ibi pertractatam vide.

Vigesimo septimò; *Bethoron inferior* nullo modo statuenda in tribu Benjamin, sed in tribu Ephraim, in confinio tribus Benjamin, juxta ea quæ à nobis dicta sunt Jos. x. v. 10. & à nobis dicuntur 1 Reg. xiii. v. 18.

Vigesimo octavò; In *Silo* nullo modo sibi constat *Adrichomius*, quam in descriptione particulari singulorum locorum ipse ponit in tribu Ephraim; at in tabula chorographica totius terræ promissæ, vel tabula particulari tribus Ephraim & Benjamin ipse collocat in tribu Benjamin. Fuisse in tribu Ephraim dubitari non debet, quemadmodum & asserit *Hieronymus* Lib. de locis Hebraicis. Adde id non obscure colligi è Scriptura sacra, etiamsi nusquam disertè asferatur. Primò enim ob id *Eleazaro* Aäronis filio primo pontifici ab ingressu in terram promissionis data est extraordinaria sedes & habitatio in tribu Ephraim Jos. ult. v. ult. quia & tabernaculum, quod in *Silo* urbe vicinà erat, collocatum fuit in tribu Ephraim, cum tamen reliquæ omnes urbes sacerdotales essent vel in tribu Juda, vel in tribu Benjamin. Rursum. Psal. lxxviii. v. 60. de tabernaculo quod situm erat in *Silo* dicitur: *Et repulit tabernaculum Silo, tabernaculum suum, ubi habitavit in hominibus*, quod ob id dicitur, quia *Silunte* jam ablatum erat tabernaculum foederis, & brevi Hierosolymæ in templum & domum fixam erat commutandum. Eadem autem res paulo post eodem Psal. lxxviii. v. 67, 68. aliis verbis ita explicatur: *Et repulit tabernaculum Joseph, & tribum Ephraim non elegit: sed elegit tribum Juda, montem Sion quem dilexit: erat ergo tabernaculum foederis Silunte collocatum in tribu Joseph, seu Ephraim*. Deinde id meo judicio manifestè patet è situ urbis *Silo*, qui à Scriptura assignatur Judic. xxi. v. 19. ubi hæc habes: *Ecce solemnitas Domini est Silo anniverfaria, quæ sita est ad Septentrionem urbis Bethel, & ad Orientalem plagam viæ, quæ de Bethel*

tendit ad *Sichimam*: cum enim *Bethel* in tribu esset Ephraim, sed in confinio tribus Benjamin; tribus autem Ephraim Aquilonaris esset tribui Benjamin, necesse est ut *Silo*, quæ ad Aquilonem erat *Bethel*, fuerit in tribu Ephraimi: item cum Orientalis esset viæ quæ ex *Bethel* ducebat in *Sichimam*; utraque autem tam *Bethel*, quàm *Sichima* in tribu Ephraim esset, necesse est & *Silo*, quæ inter utramque urbem paululum ad latus erat intercepta, fuisse etiam in tribu Ephraim. Quæ omnia quàm malè in tabula expresserit *Adrichomius* quilibet videre poterit, ut qui *Silo* ad Occidentem potius *Bethel* statuerit, eandem ad Occidentalem etiam plagam viæ, quæ de *Bethel* ibatur *Sichimam*; collocaverit.

Vigesimo nonò; In collocanda urbe *Sichem* in tribu Ephraim nullo modo videtur mihi rem attigisse *Adrichomius*, utpote quæ omnino videtur fuisse Orientalior, & *Jordani* propinquior, quàm eam collocet *Adrichomius*, utpote quæ statui debeat in *Aulon*, seu *Valle illustri*, vel juxta eam: *Aulon* autem seu vallis illustris juxta *Jordanem* erat, & ad ejus ripas hinc & inde porrigebatur. In ea autem valle vel juxta eam fuisse sitam urbem *Sichem* planè colligimus ex Gen. xii. v. 5, 6. *Cumque venissent in eam* (terram videlicet *Chanaan*) *pertransiit Abram terram usque ad locum Sichem, usque ad convallem illustrem*. Idem suaderi potest è *Deuter. xi. v. 29, 30.* ubi duo montes *Garizim* & *Hebal*, quos constat fuisse omnino vicinos urbi *Sichem*, dicuntur esse trans *Jordanem*, comparatione videlicet *Israëliitarum*, qui tunc erant in campestribus *Moab*, post viam, quæ tendit ad *Solis occubitus*, seu ad mare; in terra *Chanaan* è regione *Galgala*, quæ seu *Galgala*, seu via esse dicitur juxta vallem tendentem & intrantem procul, quæ periphrasi non dubium est significari *Aulonem vallem*, seu *vallem illustrem*, ut nos ad eum locum explicuimus: fuerunt igitur *Sichem*, *Garizim* & *Hebal*, *Galgala*, *Aulon* vallis loca vicina, & sese invicem respectantia. Idem indicatur Gen. xxxiii. v. 17, 18. ubi *Jacob* è *Socoth* trans *Jordanem* dicitur proximè transito *Jordane* venisse in *Sichem*. Denique si verum est, quod ait *Hieronymus* libro de Locis Hebraicis in voce *Agai*, ex urbe *Sichem* venientibus Hierosolymam transiri per *Agai* vel *Hai*, necessario statuenda est *Sichem* *Jordani* vicinior, cujusmodi transitum per *Hai* venientibus è *Sichem* Hierosolymam nullo modo fert tabula *Adrichonii*. Denique idem colligi potest ex descriptione Australis limitis dimidiæ tribus *Manasse*. Jos. xvii. v. 7. ubi Australis ille limes inchoatur versus Orientem ab *Aser* in *Machmethath*, qui locus dicitur respicere *Sichem*, seu esse è regione illius, & inde ad Occidentem, seu mare producitur: fuit igitur *Sichem* è regione illius loci vel urbis, quæ in illo limite ferè proximè ad *Jordanem* vergebat.

Trigesimò; Aliter constituendos esse limites tribus Ephraim, quàm *Adrichomius* constituat, imprimisque Aquilonares & Orientales, liquere potest ex iis quæ nos dicimus Jos. xvi. & xvii. imprimisque erratum ab eo in productione finium Orientalium versus *Jericho*, in *Bethoron* superiore, in Valle arundineti; quam fuisse in confinio tribus Ephraim & dimidiæ tribus *Manasse* constat, ipse verò eam collocat juxta extremos finis tribus Ephraim Australes in confinio tribus Benjamin, de finibus ejusdem tribus partim Australibus, partim Occidentalibus, de *Ramatha*, de *Bethoron* inferiore diximus supra num. 17, 26, 27.

Trigesimo primò; In dimidiæ tribus *Manasse* cis *Jordanis* finibus constituendis, tribus *Issachar*, tribus *Zabulon*, tribus *Aser*, & eà, quam inter se habent